

摘藻堂四庫全書薈要

集部

欽定四庫全書薈要

集部

御選明詩卷一百十五

詳校官原任主事臣李斯咏

欽定四庫全書薈要卷一萬八千六百十五

集部

御選明詩卷一百十五

七言絕句十五

智舷

野航

泛艇秋湖漁者稀
船頭船尾雪鷗飛
偶然放到茅菴畔
載得白頭僧共歸

題周服卿畫

兩岸芙蓉色競紅
蒹葭容易起秋風
翠禽箇箇求魚食
分占枯荷瞰水中

題徐春門畫

山頭雲濕皆含雨
溪口泉香盡帶花
此是天池穀雨候
松陰十里賣茶家

村居

獨坐孤村日日風
土堦茅舍亂堆紅
不知舊院深居地
涼葉幽花剩幾叢

釣月磯

石磯春晚白雲閒却倚東風一笑還流水自深花自落
何人垂釣月明間

冬日穆湖村居同蘊輝上人賦

買得漁蓑與釣綸天寒日暮水無鱗浩歌一曲知何處
犬吠蘆花不見人

懷高元雅

樹飛黃葉豆開花撫景縈思村路斜秋竹百竿俱似玉

清池白月想君家

天遂

畫梅

古榦橫斜意自奇
半開半蕊亦相宜
寒時悔不前村覓
知是溪橋第幾枝

圓映

又別菴居

昔別庭中竹未栽
歸來笋已破蒼苔
安知此去重還日

屋後薔薇幾度開

圓復

留別念空

問水尋山各自忙
草鞋無底踏秋霜
江南遊徧將江北
何日還來共竹房

東山紀別

谷口風斜斗笠狂
米囊夾路白於霜
山童不揜溪頭寺
一任閒雲滿竹廊

如清

答客問小徒到家消息

瓢笠星霜三月周計程應到錦江頭縱教雨雪羈行李
不在嘉州在簡州

圓憲

懷黃山吳仲玉

千里黃山別幾年冥鴻不見一書傳昨宵忽共殘燈夢
三十六峯青刺天

通洽

雪夜

雪光窗外寒如月
梅影燈前韻過僧
坐到更殘羣響盡
細吹楫杓煮春冰

如曉

春暮

雨過郊原遍落紅
柳絲無力繫東風
春陰何處棲雙燕
寂寞梨花小院中

遣句

倚杖看松殘雪後
荷鋤移竹小春前
較多白髮渾閒事
得住青山又一年

明賢

送僧歸梁溪

峯煙漠漠水雲低
欲挂輕颿日已西
江月照人人不住
隨風一夜到梁溪

法藏

山居二首

覓得三峯好卜棲
月涼松影到階齊
山空萬籟由來寂
卧聽隔林啼竹雞

花落軍持入澗香
寥寥淨域絕思量
不知下界黃昏近
猶向西窗戀夕陽

大瓊

詠史

興慶宮西花萼樓
五王簫鼓晝同游
曲江宰相千秋鑑

纔得開元二十秋

越僧

寄田石翁

寄將一幅剡溪藤江面青山畫幾層
筆到斷崖泉落處石邊添箇看雲僧

福教寺僧

過福教寺題

殘山剩水一荒基古寺煙籠白塔低
燕子不知身是客

秋風還戀舊巢泥

王司綵

宮詞

瓊花移入大明宮
旖旎濃香韻晚風
贏得君王留步輦
玉簫嘹唳月明中

沈瓊蓮

宮詞八首

尚儀引見近龍牀
御筆親題墨色香
幸得唱名居第一

沐恩舞蹈謝君王

翠絲蟠袖紫羅襦偷把黃金小帶舒中使傳宣光祿宴
內家學士作新除

香霧濛濛罩碧牕青燈的的燦銀釭內人何處教吹管
驚起庭前鶴一雙

荳蔻花封小字緘寄聲千里落雲帆一春從不尋春去
高疊香羅舊賜衫

天子龍樓瞥見粧芙蓉團殿試羅裳水風涼好朝西坐

專把書經教小王

曉臨鸞鏡整梳粧
高髻新興一尺長
花影瑣牕人下直
開籠自放雪衣娘

明牕斐几淨爐熏
閒閱仙書小篆文
晝永簾垂春寂寂
碧桃花映石榴裙

簾柳青青燕子愁
萬條齊水弄春柔
東風不與閒人贈
誰去江南水上洲

曹靜照

宮詞

一樹寒花冒雪開幽香寂寂映樓臺女官爭簇傳呼近
知是鸞宮選侍來

閱遍司農水旱書君王減膳復齋居御厨阿監新承旨
明日羹湯不進魚

夏雲英

立秋

秋風吹雨過南樓一夜新涼是立秋寶鴨香銷沉火冷

侍兒閒自理瑩篴

雨晴

海棠初種竹新移
流水潺潺入小池
春雨乍晴風日好
一聲啼鳥過花枝

秋夜即事

西風颭颭動羅幃
初夜焚香下玉墀
禮罷真如庭院靜
銀缸高照看圍棋

張紅橋

荅子羽

梨花寂寂鬪嬋娟
銀漢斜臨繡戶前
自愛焚香消永夜
從來無事訴青天

定情詩

芙蓉作帳錦重重
比翼和鳴玉漏中
共道瑤池春似海
月明飛下一雙鴻

和子羽

桂輪斜落粉樓空
漏水丁丁燭影紅
露濕暗香珠翠冷

赤欄橋上待歸鴻

橋外千花照碧空
美人遙隔水雲東
一聲寶馬嘶明月
驚起沙汀幾點鴻

草香花暖醉春風
郎去西湖妾向東
斜倚石欄頻悵望
月明孤影笑飛鴻

留別子羽

井落金瓶信不通
雲山渺渺暗丹楓
輕羅露濕鴛鴦冷
閒聽長宵嘹唳鴻

玉筍雙垂滿頰紅
關山何處寄書筒
綠牕寂寞無人到
海闊天高怨落鴻

田娟娟

題扇詩

煙中芍藥朦朧睡
雨底梨花淺淡妝
小院黃昏人定後
隔牆遙辨麝蘭香

寄木元經

聞郎夜上木蘭舟
不數歸舟祇數愁
半幅御羅題錦字

隔牆裏贈玉搔頭

慰元經

碧玉杯中琥珀光
燈前把勸阮家郎
不須苦憶人間世
萬樹桃花即故鄉

孟淑卿

春日偶成

潑眼韶光日正長
蝦鬚簾捲燕飛忙
畫樓綠暗欹楊柳
舞榭紅多睡海棠

春歸

落盡棠梨水拍堤
萋萋芳草望中迷
無情最是枝頭鳥
不管人愁只管啼

秋夜

豈花雨過晚生涼
林館孤眠怯夜長
自是愁多不成寐
非緣金井有啼蛩

登樓

為憐春去不登樓
纔上南樓動遠愁
滿地落花紅雨亂

接天芳草綠雲稠

秋日書懷

蟬咽庭槐泣素秋
幾行新雁度南樓
天邊莫看如鉤月
釣起新愁與舊愁

過惠日菴訪尼題亭子上

矮矮牆圍小小亭
竹林深處畫冥冥
紅塵不到無餘事
一炷煙消兩卷經

朱妙端

病中作

剔盡寒燈夢不成
擁衾危坐到三更
不知何處吹羌笛
落盡梅花月滿城

客中即事

華屋沉沉乳燕飛
綠楊深處嘯黃鸝
疎簾不捲薰風靜
坐看庭花日影移

秋日見蝶

江空木落雁聲悲
霜染丹楓百草萎
蝴蝶不知身是夢

又隨秋色上寒枝

染甲

金盤和露搗晴霞紅透纖纖玉筍芽
翠袖籠香理瑤瑟
綠陰新綻海棠花

馮銀

暮春

綠暗紅稀春已深
懶聽杜宇喚歸音
凋榮何限人間事
獨倚蓬牕數過禽

鄒賽貞

中秋有懷

銀漢無聲夜夜清
良宵忽感宦遊情
東山遙望人千里
想亦停杯對月明

潘氏

秋詞

翩翩黃葉落西風
月滿池亭秋夜空
黃菊酒香人已醉
白蘋江冷度哀鴻

詠柳

煙柳青青葉已齊
半簾紅日小鶯啼
玉樓人靜悲橫笛
惟有東風吹向西

春詞

小牕閒坐月朦朧
望斷天涯思不窮
黃蝶亂飛花影裡
却疑春在杏花中

茅氏

賣宅

壁有蒼苔甌有塵
家園一旦屬西鄰
傷心畏見門前柳
明日相看是路人

王素娥

渡錢塘喜晴

風微月落早潮平
江國新晴喜不勝
試看小舟輕似葉
載將山色過西陵

獨愁

黃昏愁聽雨蕭蕭
挑盡殘燈夜寂寥
綵綫罷拈腸欲斷

薰籠香冷火應銷

陸娟

代父送人還新安

津亭楊柳碧粼粼
人立東風酒半酣
萬點落花舟一葉
載將春色到江南

江西婦女

一葉芭蕉

何處移來一葉青
似同羅扇鬪輕盈
今宵風雨重門靜

減却瀟湘幾點聲

儲氏

雨後

天桃灼灼倚牕前
春色繽紛帶紫煙
昨夜雨聲來枕上
惜花人醒不曾眠

馬間卿

七夕

靈鵲成橋事有無人間
今夜憶黃姑倚牕坐久
秋聲動

一葉西風到碧梧

寄升菴

嬾把音書寄日邊
別離經歲又經年
郎君自是無歸計
何處青山不杜鵑

李玉英

送春

柴扉寂寞掩殘春
滿地榆錢不療貧
雲鬢霓裳半泥土
野花何事亦愁人

毛鈺龍

冬夜

玉井無聲戶已扃
一庭霜月冷如凝
誰憐寂寞書牕下
凍影梅花伴夜燈

劉氏

故城過父友李公舊居

暮雲深鎖故城春
綠樹蒼煙舊白蘋
昔日高樓雙燕子
定巢無處往來頻

王虞鳳

春日閒居

濃陰柳色罩牕紗
風送爐煙一縷斜
庭草黃昏隨意綠
子規啼上木蘭花

桑貞白

春宵

一鉤新月射房櫳
拂拂春風入幕中
啼鳥數聲醒枕夢
杜鵑花發半牕紅

秋夜

高飈颯颯動疎林
剔起銀燈茸舊衾
月上西牕人寂寂
隔林猶度搗衣砧

寄遠

日暮登樓強自歌
陌頭楊柳望中多
思君書劍天涯客
三月春光有幾何

春日即事

雨晴春暖百花香
戲蝶游蜂各自忙
也擬東郊踏青去

門前流水又斜陽

董少玉

裁衣

芙蓉江北雁飛飛
燕子磯邊人未歸
只怕沈郎腰已瘦
遲迴難寄舊時衣

海棠花

小樓風定月初斜
紫玉新枝綰落霞
睡起不堪重秉燭
春來愁殺海棠花

齊景雲

贈別傅生

一呬春醪萬里情
斷腸芳草斷腸鶯
願將雙淚啼為雨
明日留君不出城

周潔

登樓

憑闌一望白雲重
松竹蕭森裊露濃
樹外連瀉流不斷
依稀如聽秣陵鐘

戲諸姊作假花

鏤花雕葉百般新
巧手分明遂奪真
自是深閨無定鑒
金錢輸與弄虚人

邢慈靜

靜坐

荆釵裙布念重違
却掃焚香自掩扉
莫向吹簫羨嬴女
多年已辦五銖衣

屠瑤瑟

秋夜贈七襄

綺閣知音總不羣
挑燈刺繡薛靈芸
夜涼明月低繩戶
猶簡蘭閨倒薤文

送外

蕭蕭梧葉作秋聲
況復征人欲遠行
此去西泠煙草碧
月高霜落水痕清

沈天孫

春日送七寶姊歸寧

一曲驪歌淚暗垂
香車陌上過春荑
關情最是靡蕪草
何必楊枝綰別離

贈湘靈二首

芙蓉兩頰映羅衣
笑拂釵頭雙鳳飛
彷彿疑施青步障
知君能解小郎圍

柳眼低垂護墨池
菱花掩映遠山眉
輸卿刀尺工挑錦
夜夜燈前借履綦

花燭詞贈王蕙芳

比翼雙飛宿上林流蘇掩映合歡衾香奩賦就憐蘇蕙
織出迴文寄錦心

秋夜

蟲飛紈扇早知秋明月穿牕照畫樓
洒淚兩行何處落
臨風寄向故園流

袁九叔

燈詞

家家行樂管絃催火樹千枝向夜開
見說南鄰祠太乙

笑聲一片踏歌來

玉鳳嫺

燕子樓

燕子樓頭燕子回
何年鶴去見歸來
相思怨結東風淚
洒向殘花已剩灰

張引元

戊申上元寫懷

欲向空門淨六塵
松龕蒲簟度芳春
病容消瘦慵梳洗

一任東風冷笑人

燕子樓

人自傷心春自回
倚闌愁覩燕歸來
玉簫吹斷秦樓曲
贏得紅顏鏡裏灰

張引慶

燕子樓

維陽三月雨如煙
添得離人思黯然
惆悵秦樓分鳳侶
青燈寒月自年年

陸卿子

萬厯宮詞

蘭茝蕭條白露凝
夜深臺殿起秋聲
君恩何處中天月
一片清光處處明

徐媛

別曹孀

木落西風萬壑幽
恐將離思為君留
碧雞關外淒涼月
偏照蠻雲夜夜秋

林玉衡

小樓詠雪月口占

梅花雪月本三清
雪白梅香月更明
夜半忽登樓上望
不知何處是瑤京

姚氏

即事二首

晚煙翠出草亭斜
曲曲深村小築家
幾點病鷗眠夜月
半林殘雪照梨花

簾捲輕寒春帳空
夢殘芳草雨催風
隔牕陣陣聲偏急
狼籍庭前一夜紅

劉苑華

舟發羅水問侍女

門前瞬息是天涯
剛是辭家便憶家
試問羅江幾了水
送人雲裏拾春花

黃幼藻

夏日偶成

深院塵消散午炎篆煙如夢晝淹淹輕風似與荷花約
為送香來自捲簾

雨中看紫芍藥

粧樓初下自傾城冉冉香生繡戶清厭說廣陵春色暮
胭脂和淚雨中傾

武陵秋景

湖上芙蓉近小舟曉來清淚對花流吳州客自傷長夜
不為西風怨早秋

登樓望海

遙山層疊海雲開
浴鷺飛鷗自去回
春水茫茫天不盡
片帆浮動碧空來

會稽女郎

新嘉驛題壁

銀紅衫子半蒙塵
一盞孤燈伴此身
恰似梨花經雨後
可憐零落舊時春

萬種憂愁訴與誰
對人強笑背人悲
此時莫把尋長看

一句詩成千淚垂

沈紉蘭

秣陵道中風雨

剔盡寒燈風動幃
長途況是客單衣
無端燕子磯頭雨
一舫隨人到處飛

早春憶外

映日初花隔檻明
春風嫋嫋透寒輕
傷心怕聽枝頭鳥
莫向王孫歸路鳴

王氏

金吾公忤璫削籍南還舟中感慰

驛路蕭條怯問津行囊檢拂舊緇塵故園松菊猶無恙
歸臥牛衣谷水濱

奉勅太液池觀荷

御池清淺石粼粼滿徑紅蕖映白蘋水殿風來塵不到
叨陪鳳輦荷恩新

春郊看杏花

帝里驚看春色深杏林遙間柳條陰故園消息經春斷
極目憑闌思不禁

對雪

拂幌飄牕玉不如一庭寒色曉光餘閨中詩思同清潔
分付雙鬟莫掃除

秋夜聞促織

錦字迴文織未成蘭房清夜坐深更蕭蕭絡緯啼煙草
催老秋光是此聲

黃雙蕙

和會稽女子

憔悴天涯對阿誰
若為多露獨含悲
空憐子夜孤亭淚
盡作霜楓帶雨垂

黃淑德

七夕

鵲駕成橋事有無
年年今夕會星娥
時人莫訝經年隔
猶勝人間長別多

春晚

春風日日閉深閨
柳老花殘鶯自啼
寂寞小牕天又暮
一鉤新月挂樓西

秋晚

柳外慵蟬噪晚霞
風牀書卷篆煙斜
憑闌自愛秋容淡
閒數殘荷幾朶花

項蘭貞

送外赴試

柳陰輕綰木蘭舟
杯酒殷勤動別愁
此去但看江上月
清光猶照故園樓

詠梅

冰玉孤清世外姿
娟娟新月上疎枝
無情短笛休輕弄
未是春風點額時

吳令則

憶玉之

春來草色想河關
遠道絲絲不可攀
翻恨白雲飛去疾

夕陽千里露童山

吳令儀

夜

新月不來燈自明
江天獨夜夢頻驚
長年自是無歸思
未必風波不可行

方孟式

江上聽潮

乘春畫舫一溪雲
獨宿江舟待月明
陡覺潮生驚夜語

南天寒葉盡飛聲

芝城寄女

莫問花開花落時幽芳不必鬪濃枝
晝長無事香消篆
朝誦楞嚴暮誦詩

憶舊

一別江潭月幾圓相憐人面不如前
依稀舊日芳菲在
秋雨梧桐十二年

方維儀

春庭

煙含堤柳水滌沙寄寓秦淮已作家
一度空庭人寂寞不知溪上落梅花

春雨

春江新雨到牕西雲暗山光遠
樹迷零落梨花飛欲盡故園應有鷓鴣啼

楚江懷吳妹茂松閣

空林隕葉暮烏啼雲水迢迢隔皖谿
夜發蒼梧寒夢遠

楚天明月照樓西

姚氏

詠蒲扇

世間物性初無定
百鍊剛成繞指柔
何似荏蒲經織後
能將九夏變三秋

沈宜脩

仲春寄表妹張倩倩

湖外青山別路長
沉吟舊事總堪傷
故園明月門前柳

回首春風各斷腸

秋夜

悲秋不是斷腸初
風景依依雲影疎
玉漏自殘燈自落
小牕斜月半庭虛

茉莉花

如許閒宵似廣寒
翠叢倒影浸冰團
梅花宜冷君宜熱
一樣香魂兩樣看

葉紈紈

春日感懷

羅袂消殘舊日香
啼痕幾度濕年芳
無情懶向東風立
有恨誰憐一夢長

秋日偶題

一番搖落一番嗟
咫尺天涯夢裏家
莫道秋來不憔悴
滿庭都是斷腸花

葉小鷺

雨夜聞簫

紗牕徒倚倍無聊
香燼熏爐懶更燒
一縷簫聲何處弄
隔簾微雨濕芭蕉

別蕙綢姊二首

歲月驚從愁裏過
夢魂不向別中分
當時最是無情物
疎柳斜陽若送君

枝頭餘葉墮聲乾
天外淒淒雁字寒
感別却憐雙鬢影
竹牕風雨一燈看

詠畫屏美人二首

庭雪初消月半鉤輕漪月色共相流玉人斜倚寒無那
兩點春山日日愁

紅深翠淺最芳年閒倚晴空破綺煙何似美人腸斷處
海棠和雨晚風前

送蕙綢姊二首

絲絲楊柳拂煙輕總為愁人送別情惟有流波似離恨
共將明月伴君行

綠酒盈尊未及銜那堪津樹引征帆情知此別難留住

相對無言濕杏衫

游仙詩

可是初逢萼綠華
瓊樓煙月幾仙家
坐中聽徹涼州曲
笑指牕前夜合花

張倩倩

憶舊

故人別後杳沉沉
獨上高樓水國陰
鴻雁不傳千里恨
天涯流落到如今

過行春橋

行春橋上月如鉤
行春橋下月欲流
月光到處還相似
應照銀屏夢裏愁

春日

春衫帶綰縷金綃
畫永空閒碧玉簫
情到寄將何處好
曲欄干外折紅蕉

沈憲英

憶李玉照

樓上春深乳燕來半簾花影自徘徊子規聲裡黃昏月
叫斷東風夢不回

花下憶瓊章姊

弱水蓬山夢不分紅箋無處寄行雲海棠睡醒清宵月
影入紗牕疑是君

沈華鬢

春夜憶昭齊姊

春寒香靜月朧朧閒捲湘簾罷繡工蘭燼含花人不寐

獨吟殘句送歸鴻

顧若璞

宮詞

垂柳千條拂御墀
涼風初到影娥池
銀箏玉笛花前奏
不唱班姬團扇辭

武氏

初入南國

南州初入便神清
步步新秋送水聲
金縷兩行濃夾柳

灘雲如染照山明

晉臺獨夜

晉臺玉鏡照春流
綠草朱鱗步步幽
百子帳頭香自暖
銀牀歸坐夜懸鉤

翁桓

重過西湖

風風雨雨鳥空啼
草綠山腰水滿隄
畫閣已傾歌舞散
十年重到六橋西

倪仁吉

宮意圖

調入蒼梧斑竹枝
瀟湘渺渺水雲思
聽來記得華清夜
疎雨銀缸獨坐時

彈琴

梨花小院午風輕
謾理冰絃入太清
一片梧桐心未死
至今猶發斷腸聲

四時宮意

秋到長生巧太多正逢牛女會天河蛛絲瓜果無心祝
百子池頭月蕩梭

屏山六曲水雲鄉夜雨頻添甲帳涼枕畔香殘眠未穩
下簾驚醒睡鴛鴦

周淑禧

杜康廟

酺有新糟醖有醕杜康橋上客題詩最憐苦相身為女
千載曾無儀狄祠

湯文玉

司吾春游詩

山雨初晴洗佛螺
春風處處揭青莎
采香不倦溪邊路
多少飛紅趁轂羅

謝五娘

初夏

庭院薰風枕簟清
海榴初發雨初晴
香銷夢斷人無那
聽得新蟬第一聲

春日偶成

乳燕銜泥春晝長
倚闌無語立斜陽
桃花紅雨梨花雪
相逐東風過粉牆

初夏

啼鳥聲中午夢回
篆香重撥已成灰
東風似恨春歸去
吹送楊花入戶來

小園即事

翠竹蒼梧手自栽
芙蓉未秀菊先開
小軒睡起日將午

黃葉滿庭山雨來

感懷

四面簾垂碧玉鉤
重重深院鎖春愁
天涯行客無歸信
花落東風懶下樓

春夜

銀燭燒殘夜漏聲
畫屏香篆影孤清
一庭春色無人管
分付梨花伴月明

黃媛貞

山村

春山春水碧依依
草屋風輕燕子飛
行到半坡亭小住
野雲何事亦來歸

貴陽解中

天涯二月早芳菲
官舍何曾遠翠微
如此溪山堪累月
杜鵑猶道不如歸

曹壽奴

寄外

去作西湖十日期經年猶滯謝公池別來夜夜雙行淚
只有珊瑚舊枕知

徐簡簡

宮詞二首

沉香亭子玉勾欄遍植名花按月看第一莫栽紅芍藥
此花開日定春殘

庭院沉沉盡日局自將書法學蘭亭中官領得芙蓉粉
催入長春寫御屏

寄懷


夾岸垂楊卷落花
春風咫尺是天涯
重門深鎖樓中燕
獨有王孫不在家

江娥

戊戌除夕守歲和王孫作

仙茆筆禿硯成冰
守歲無聊寢復興
栢葉酒香餅已罄
小牕留得隔年燈

御選明詩卷一百十五



總校官庶吉士臣侍朝
校對官編修臣莫瞻菴
謄錄監生臣和其聲

欽定四庫全書薈要

集部

御選明詩卷一百十六

詳校官原任主事^臣李斯咏

欽定四庫全書薈要卷一萬八千六百十六

集部

御選明詩卷一百十六

七言絕句十六

羅素月

梅花村

麻姑仙窟鮑姑山鳳子翻飛遠嶠還
玉女峰頭人冷笑
杜蘭香去嫁人間

賽濤

憶家園一絕

日望南雲淚濕衣
家園夢想見依稀
短牆曲巷池邊屋
羅漢松青對紫薇

朱斗兒

送人

揚子江邊送玉郎
柳絲牽挽柳條長
柳絲挽得行人住
多向江頭種兩行

趙麗華

席上賦別

妾舟西發君舟東頃刻天生兩處風此去雲山天際渺
寸心千里附冥鴻

朔朝霞

送人

秋風江上送君舟落葉江楓總別愁解纜不知人去遠
憑欄猶倚夕陽樓

周青霞

病中別禹錫於藤谿

寒林落日倚枯藤
淚灑清溪紅欲冰
此際與君為別去
好尋松栢到西陵

王儒卿

寄吳郎

舊事巫山一夢中
佳期回首竟成空
郎心亦是浮萍草
莫怪楊花易逐風

趙彩姬

憶故居

柳絮春泥玉壘封
珠簾深鎖暮煙濃
分明記得雙棲處
夢繞青樓十二重

續首句成韻二首

桃源人去絳幃寒
強折花枝帶笑看
月上梅梢空有影
風吹柳絮不成團

桃源人去絳幃寒
萬樹桃花春未殘
洞口有雲留白鶴
人間無路見青鸞

寄陳八玉英時留姑蘇

何處簫聲獨上樓
傷心桃葉水空流
一從南國春銷後
誰復佳人字莫愁

暮春江上送別

一片潮聲下石頭
江亭送客使人愁
可憐垂柳絲千尺
不為春江綰去舟

送張幼于還吳門

花前雙淚濕衣裾
把酒江亭落日餘
此去吳江霜月滿

逢人好寄洞庭書

送沈嘉則遊廣陵

秋風吹送木蘭舟
處處青山待隱侯
莫向青山歌玉樹
揚州花月使人愁

馬守真

奉和諸社長小園看牡丹枉贈之作

露滋繡萼弄輕寒
把酒同君帶笑看
憶昔漢宮人去遠
阿誰今倚玉闌干

春風簾幙賽花神
別後相思入夢頻
樓閣新成花欲語
夢中誰是畫眉人

朱無瑕

閨夢

清霜飛急漏聲遲
遙夜孤幃憶別離
幽夢欲成明月去
却憑何處炤相思

春閨怨

學語新鶯驚夢起
紅妝滿樹催桃李
年華不管是風清

十二闌干春獨倚

崔重文

別黃玄龍絕句

九月江南似小春
偷春花鳥殢歸人
妝樓直對長干道
愁見行車起暮塵

楓落鴉翻秋水明
長橋衰柳古今情
從來歌板銀罌地
多為傷離不忍行

華裾賦別酒初醺
水調吳歌夜入雲
此曲由來能解恨

一時淒切半緣君

郝文珠

送張隆父還閩

一曲春風酒一卮
渡頭楊柳不開眉
從今海路三千里
有夢為雲到也遲

鄭如英

閨怨

曲曲迴廊十二闌
風飄羅袂怯春寒
桃花帶雨如含淚

只恐多情不忍看

春日寄懷二首

沈沈無語意如癡
春到牕前竟不知
忽見寒梅香欲褪
一枝猶憶寄相思

月落西軒夜色闌
孤衾不耐五更寒
君情莫作花梢露
纔對朝曦濕便乾

景翩翩

晏起

晏起茶香解宿醺
闌干花氣午氤氲
侍兒指點湘簾外
若箇春山多白雲

紫蘭

碧玉參差簇紫英
當年刺有國香名
風前漫結幽人佩
澧浦春深寄未成

夜坐

柳底繁陰月易藏
無端寒露泣寒螿
殘秋莫坐空堂夜
二十五聲點點長

舟發沙溪

青溪九曲白雲鄉
溪上行舟欸乃長
誰把金丸打野鴨
偏驚幾處睡鴛鴦

送張孝廉

柳絲細織曉煙青
惻惻春寒長短亭
馬度山腰蹄尚嬾
濕雲如夢未全醒

泰寧病中

春日顰眉長閉門
東風吹雨倍銷魂
不知野外垂絲柳

青入南頭第幾村

馬如玉

蹴踘

腰肢嬝嬝力微微
滾滾紅塵拂羽衣
掩月鬢邊星獨墜
石榴裙底鳳雙飛

茅山道中送邢使君之西湖

郎趁仙槎趁晚風
妾乘油壁入雲中
尋常一樣天邊月
臨水登山望不同

薛素素

雨夜

江城漏轉夜迢迢
坐向芳尊歎寂寥
挑盡銀燈愁不盡
滿庭疎雨濕芭蕉

畫蘭竹題贈蘇時欽

翠竹幽蘭入畫雙
清芬勁節伴閒牕
知君已得峨眉秀
我亦前身在錦江

沙宛在

閨情

白燕雙雙入幕頻
梨花香遍雪為茵
夜來縱有游仙夢
不作烏衣國裏人

朝來報道牡丹開
拚取紅紗護錦堆
癡蝶貪香尋不得
遶兒衣袂百千回

楊玉香

荅林景清

銷盡爐香獨掩門
琵琶聲斷月黃昏
愁心正恐花相笑

不敢花前拭淚痕

周文

二十初度

作惡春風二十年
愁眉常到鏡臺前
去年楊柳為誰折
今歲梅花黯自憐

梁小玉

落花

翠鈿無數碎寒灰
冉冉尋芳細數來
同病相憐無限淚

紅痕墮落錦千堆

珠

宛轉誰通九曲珠
最憐探海夜光枯
須知顆顆鮫人淚
能向龍領取得無

琥珀枕

仙苓千載赤脂殷
雕琢移來湘簾間
從此不須沾小草
長陪清夢白雲閒

篆章

揮灑霞箋寄隴頭雙鈴題處紫雲浮
兒家曾掌司花印
總領層城十二樓

釀酒

麴部尚書譜不留椒花細雨冽香流
釀王家法應如是
新拜雲谿女醉侯

呼文如

送生後還李樓

莫問天台落日愁桃花片片水悠悠
寒牕一閉秦簫月

惹得人呼燕子樓

得生詩寄怨

人間自是語便便不是春風不肯憐為寄一聲何滿子
相思今日盡君前

題庭中安石榴呈生

安石孤根託謝庭合歡枝上日青青懸知雨露深如許
結子明朝似小星

至武昌寄生

孤舟別後兩相望
霜露淒淒落葉黃
鵠磯頭天萬里
知君何日渡瀟湘

別後

別後江頭夜雨涼
可憐憔悴謝紅妝
腹中不有郎行路
那得車輪日轉腸

王微

憶江南

寒沙日午霧猶含
蕭瑟風光三月三
撲地柳花新燕子

不由人不憶江南

湖上早起

中流何處聽雞鳴
只看船牕煙霧生
剛到五更翻睡去
急披衣起已天明

擬燕子樓四時閨意

錄二首

淡煙如夢罨重帷
樓外晴絲與淚吹
判得鶯花笑憔悴
不能輕薄學楊枝

何須鶯語喚春回
濃綠眉痕展不開
多謝伴愁梁上燕

只將孤影入樓來

庚申秋夜予卧病孤山閒讀虎關女郎秋夢詩
悵然神往不能假寐漫賦一絕併紀幽懷予已
作木石人尚不能無情後之覽者當如何也

孤枕寒生好夢頻幾番疑見忽疑真情知好夢都無用
猶願為君夢裏人

秋夜集石湖分得妝字

雲罨湖山遠樹蒼
鵲飛破藕塘香
月明處處添秋色

一束芙蓉正洗妝

昌化道中

照返煙溪樹影斜
千山含翠暮雲遮
年來已自多愁緒
古道無人更落花

園居

桃嫣李笑滿園春
何事無聊似病身
獨坐水邊殘照落
定風幡下候花神

秋夜二絕句

淒切秋聲蟲絡絲入簾殘月似蛾眉愁心不逐閒雲散
長比寒溝月照時

何處鳴蛩不可憐霜閨搖落夜無眠題殘紈扇光疑月
多少人間不共圓

蔡彬

贈別

傷情不奈出宜春遙見離亭倍愴神昨夜樓頭好明月
今宵分照遠行人

郝婉然

鳳凰臺

雨過荒臺春草長
浮雲暗處是斜陽
杏花零落知多少
黃蝶翻飛野菜香

李貞儷

月夜有懷

不見風前舊令君
滿庭霜月白於雲
仙居只隔清谿曲
此夜鐘聲應共聞

茹瓊

元夕

湖南湖北雪初消
畫鼓春幡總寂寥
不是鄰家燈火近
那知今夕又元宵

楊宛

春日有感

翠館紅樓白石橋
高花低柳自飄飄
畫闌幾處無人到
多少春光暗裏銷

次止生七夕見懷韻

遙遙望斷白蘋洲
惟見銀河一派流
那得閒情還乞巧
夢魂尋遍木蘭舟

聞雁

萬里翩翩度碧虛
月明送影意何如
也知一向郎邊過
自是多情少寄書

即事二首寄修微

東風堪賞猶堪恨
綻盡花來送盡花
可惜一庭深淺色

隨風今去落誰家

東風同護曲闌中一樣花枝別樣紅縱是不容春綰住
莫教狼籍宋家東

舟泊黃河與止生舟隔兩岸口占寄示

浪打鴛鴦兩岸飛兩心相望共依依何如溪上眠沙穩
相逐相呼趁月歸

行徹

秋日懷母

不見慈闈秋信來
籬邊黃菊帶霜開
為憐消息無人寄
一日峰頭望幾回

高百戶

閩歸簡吳巨手

半牀書卷剗山河
如此歸來可奈何
便欲與君同一醉
梅花不比舊時多

荆先生

白團扇撲蠅為血
所漬因繪為紅葉

新霜楓葉醉殷紅
記得題詩出後宮
繞遍御溝尋不見
被風吹入月輪中

陳墅里人

春日偶題

細細冥冥濕燕泥
棟花香煖鶉鴝啼
籬邊筍迸無多日
恰與茅簷一丈齊

玉堂逐客

題西禪寺詩

隔江人唱浪淘沙月上梧桐影未斜客到潯陽談往事
青衫無淚濕琵琶

洞庭老人

歌

八十滄浪一老翁蘆花江上水連空世間多少乘除事
良夜月明收釣筒

耳園公

君山

山色湖光日漸曛誰將玉珮弔湘君天風一夜連湖起
吹落蒼梧萬里雲

盤江逋客

題分水關

一道泉分兩道泉層層松栢翠參天鷓鴣聲裏山無數
合向誰家草閣眠

碧岡道人

堯渡

秋水初平露石磯
堯城渡口柳依依
無端隔岸漁歌起
白鳥一雙撲鹿飛

鍾山野老

風香閣

風香高閣倚層厓
一老扶筇下薜階
獵火夜來驚鹿過
松根拾得舊銀牌

電白老兵

題城樓

畫角吹來歲月深
譙樓無古亦無今
不如歸我龍山去
萬竹青青何處尋

無名氏

芭蕉仕女

見高播梓選

獨立徘徊意若何
羊車聲已過鑿坡
黃金屋裏春風面
不及芭蕉雨露多

題宣和畫石榴

金風吹綻絳紗囊
零落宣和御墨香
猶喜樹頭霜露少

南枝有子殿秋光

書石溪亭

見資江石刻

桃花依舊放山青
曲几焚香對畫屏
記得當年春雨後
燕泥時汚石溪亭

石空山寺題詩

疊嶂玲瓏竦石空
誰開蘭若碧雲中
僧閒夜夜燃燈坐
遙見青山一滴紅

武磯山詩

見黃州志

寂寞武磯山上樹蕭條
邈阜水中天垂楊不管人間事
猶自青青兩岸邊

跨鶴歸來不計年洞中流水綠依然
紫簫吹徹無人見
萬里西風月滿天

白河漁舟

見溇縣志

溶溶漾漾白河流點點輕鷗上水浮
遙望孤燈明滅處
葦花斷岸一漁舟

南浦

見浦城志

南浦春流漲綠波
溶溶漾漾浴鷗多
銷魂尚記江淹賦
碧草青苔送別何

題陳山壁

見不出戶庭錄

啟牕日日對青山
山色青青不改顏
我問青山何日老
青山問我幾時閒

瑤華洞仙女

絕句

天葩小院敞銀屏
鵲散天河逗客星
欲識別來幽意苦

晚峰長想黛眉青

徐仙

偶作

靜裏乾坤不計春
非非是是任紛紛
醒原醉白今何在
雲外青山山外雲

霍山巖壁仙

絕句

八表煙霞總一家
藍橋到此作生涯
人間富貴塵如海

虛度春風三月花

桃花仕女

詩八首

錄五首

梳成鬆髻出簾遲
折得桃花三兩枝
欲插上頭還住手
徧從人問可相宜

家住東吳白石磯
門前流水浣羅衣
朝來繫著木蘭棹
閒看鴛鴦作對飛

潯陽南上不通潮
却算遊程歲日遙
明月斷魂青靄靄

玉人何處教吹簫

西湖荷葉綠盈盈露重風多蕩漾輕
倒折荷枝絲不斷
露珠易散似郎情

芙蓉肌肉綠雲髮幾許幽情欲話難聞
說春來倍惆悵
莫教長袖倚闌干

吳師禹

船上歌詩二首

郎提密網截江圍
妾抱長竿守釣磯
滿載鰕魚都換酒

輕煙細雨又空歸

夢香月白醒時稀
潮去潮來自不知
除却醉眠無一事
東西南北任風吹

箋上題詩

世路無媒君莫悲
開闌看取牡丹枝
姚黃魏紫俱零落
能得春風有幾時

貞元道人

絕句

勾漏山頭古洞天金堂玉室地相連
門前千尺長松樹親手栽來不記年

董槐

絕句

原南原北綠如煙萬轉千聲鳥可憐
擷得榆錢盈兩袖春風寒食自年年

蕭貞玉

懷春詩

沈印香花四寸羅銀尖彈鳳麗情多可憐十度傳觴手
未向紅牕寫翠娥

嘉興卜仙

紅梅

玉骨冰肌孰與儔點些顏色在枝頭牧童睡起朦朧眼
錯認桃林誤放牛

鄭夢周

舟中

湖水澄澄一鏡明
舟中宿客不勝情
悄然夜半微風起
十里菰蒲作雨聲

李崇仁

僧舍

山北山南細路分
松花含雨落紛紛
道人汲井歸茅舍
一帶青煙染白雲

權遇

竹長寺

衙罷乘閒出郭西殘僧古寺路高低祭星壇畔春風早
紅杏半開山鳥啼

趙云仡

卽事

荆門日午喚人開步出林亭石滿苔昨夜山中風雨惡
一溪流水泛花來

鄭道傳

重九

故園歸路渺無窮
水遶山圍第幾重
望欲遠時愁更遠
登高莫上最高峰

曹庶

五靈廟

村南村北雨淒淒
五廟靈宮楊柳低
十里江山看枕上
竹林深處午雞啼

鄭希良

塞上

客牕偏惜歲華殘
蘆荻蕭蕭雪滿灘
塞外風高鷹翮健
陣前雲起角聲寒

白元恒

秋夜

草堂清夜雨初收
小雨寒螢濕不流
獨卧牀頭思往事
砌蟲啼破一簾秋

金訴

對馬島舟中夜作

獨泛孤蓬卧未安
西風一夕晚潮寒
海天秋色尋無處
却向潘郎鬢上看

南孝溫

西江寒食

天陰籬外夕寒生
寒食東風野水明
無限滿船商客語
柳花時節故鄉情

徐居正

即事

小沼如盤水淺清菰蒲新發荻芽生連筒引却前溪水
養得芭蕉聽雨聲

春日

金入垂楊玉謝梅小池新水碧于苔春愁春興誰深淺
燕子不來花未開

申從謨

傷春

茶甌飲罷睡初輕隔屋聞吹紫玉笙燕子不來鶯又去

滿庭紅雨落無聲

許琮

安興道中次王黃門韻

韶光如酒著人迷
漫把霜毫取次題
山北山南春雨歇
隔林紅日鵲鳩啼

登鳳山樓次韻

獨倚雕闌帽影斜
客中衰鬢已非鴉
不禁杜宇聲聲苦
啼盡東風第一花

松林晚照次韻

一村桑柘夕陽微芳草叢生柳絮飛已過蘭亭修禊後
風寒猶未著春衣

所串館道中即事次韻二首

數株官柳野橋旁飛絮紛紛撲馬香江雨欲來龍氣黑
水風吹作十分涼

家在江南水竹村鳥啼花落掩柴門年年奔走東西路
坐席何由得暫溫

盧公弼

鳳山樓次董內翰韻

畫樓登眺帽簷斜苔壁詩成字點鴉幽興未闌天欲暮
一簾疎雨落桐花

初見杜鵑花次雲岡修撰韻

際曉紅蒸海上霞石崖沙岸任欹斜杜鵑也報春消息
先放東風一樹花

鄭士龍

長虹

垂虹屈曲跨清波
藻荇香中笑語過
恰似松江三百尺
樣船聞唱采菱歌

金安國

開城太平館次韻

溫韞陵廢井空青
種稌田荒但記名
舊跡不隨時代滅
停驂落日一傷情

申光漢

寄稷山宰閔君

招尋相對縣西陵
白日玲瓏看納冰
被酒夜歸渾似夢
小村時點績麻燈

書事

歸思無端夢自迷
先生今老小村西
杏花繞屋繁如雪
春雨霏霏山鳥啼

李好閔

郊院別席

西郊菡萏綠盈池折得芳華贈別離此去金臺情不斷
寸心真似藕中絲

許筠

晚詠

重簾隱映日西斜小院回廊曲曲遮疑是趙昌新畫就
竹間雙鶴坐秋花

東吳子魚先生

野館荒涼門半開入簾殘月影徘徊露蟲偏向秋林織

今夜故人來不來

金尚憲

早春

水際城邊野鳥飛
漸聞宮漏晝間稀
東風日日靡蕪綠
塞北江南總憶歸

初至登州

南商北客簇沙頭
畫鷁青簾幾處舟
齊唱竹枝聯袂過
滿城明月似揚州

崔澱

春日

楊柳依依江水生
杏花如雪落無聲
青霞卷盡畫樓出
中有玉人吹玉笙

贈人

碧溪哀玉響
楓林山水孤
懷恣遠尋仙子
不來秋已暮
古樓斜日獨登臨

林億齡

送友還山

塵土無憂染素衣
蕭條石徑接柴扉
飄然又作抽簪計
夢逐白鷗江上飛

趙昱

贈鑑湖主人

十年長掩故山扉
塵土東華幾染衣
想得鑑湖春夜月
子規應喚不如歸

李孝則

烏嶺

秋風黃葉落紛紛
主屹山高半沒雲
二十四橋鳴咽水
一年三度客中聞

柳永吉

福泉寺

落葉鳴廊夜雨懸
佛燈明滅客無眠
仙山一到傷春暮
烏帽欺人二十年

李嶸

題僧軸

流雲山口草萋萋
夜逐香煙到水西
醉後高歌答明月
江花落盡子規啼

金宗直

聖母祠禱雨

前峰已失後峰青
屏翳撩人不解晴
誰畫遨頭一蓑笠
滿村風雨看苗生

答晉山相公

村南村北祝豚蹄
榆柳陰陰鳥雀啼
身遇太平生事足
日斜扶醉斷橋西

送李節度赴鎮

鰲背樓臺一俯憑
海波萬里碧千澄
太平未試龍韜策
射雉還過竹院僧

朴文昌

題郭山雲興館畫屏

萬頃滄波欲暮天
將魚換酒柳橋邊
客來問我興亡事

笑指蘆花月一船

李達

病中對雨

花時人病閉門深
強折花枝對酒吟
怊悵流光夢中過
賞春無復少年心

李植

泊漢江

春風急水下輕艘
朝發驪陽暮漢江
篙子熟眠雙櫓靜

青山無數過船牕

鄭之升

留別

細草閒花水上亭
綠楊如畫掩春城
無人為唱陽關曲
惟有青山送我行

姜渾

贈妓

雲鬟梳罷倚高樓
鐵笛橫吹玉指柔
萬里關山一輪月

數行清淚落伊州

金淨

旅懷

江南殘夢晝厭厭
愁逐年華日日添
鶯燕不來春又去
落花微雨下重簾

鄭知常

醉後

桃花紅雨鳥喃喃
繞屋青山間翠嵐
一頂烏紗慵不整

醉眠花塢夢江南

李仁老

題杏花鸚鵡圖

欲雨未雨春陰垂杏花一枝復兩枝問誰領得春消息
惟有鸚鵡之與鵲之

崔孤竹

仙桂曲題月娥帖和蓀谷韻

碧落迢迢鸞路長天風吹送桂花香玉簫歸去瑤壇上

羅襪寒深一寸霜

李秀才

呈吳子魚先生

凌晨走馬入孤城
籬落無人杏子成
布穀不知王事急
隔林終日勸春耕

監秀才

席上賦呈吳子魚先生

平壤城北路偏賒
滿目煙波日又斜
且向尊前惜歡笑

馬頭開遍海棠花

無名氏

宮詞

以下六首見孫谷詩集

平朝日出殿門開
鳳扇雙行引上來
遙聽太儀宣詔語
罷朝新幸望春臺

宮牆處處落花飛
侍女燒香對夕暉
過盡春風人不見
院門金鎖綠生衣

中官清曉覓才人
合奏笙歌滿殿春
別詔梨園吹玉篴

御袍新賜錦麒麟

江陵東軒

水滿南塘生白煙
小桃花發竹林邊
自憐病客無閑緒
一度傷春似去年

嘉山道中

嘉陵北望接龜城
歷數來途更遠行
試向長林望津渡
濕雲沈野不分明

送尹佐郎暉之上京

九月遼陽塞草腓朔風霜氣滿征衣行人欲近燕山宿
雁乳平蕪曉不飛

月山大君亭

古寺尋花

春深古寺燕飛飛深院重門客到稀我正尋花花盡落
尋花翻為惜花歸

趙媛妾李氏

謾興贈郎

柳色江頭五馬嘶
半醒半醉下樓時
春紅欲瘦臨妝鏡
試寫纖纖却月眉

登樓

紅欄六曲壓銀河
瑞霧霏霏濕翠羅
明月不知滄海暮
九疑山下白雲多

自適

虛簷殘溜雨纖纖
枕簟輕寒曉漸添
花落後庭春睡美
呢喃燕子要開簾

秋思

翡翠簾疎不蔽風
新涼初透碧紗櫳
涓涓玉露團團月
說盡秋情草下蟲

秋恨

絳紗遙隔夜燈紅
夢覺羅衾一半空
霜冷玉籠鸚鵡語
滿堦梧葉落西風

寶泉灘卽事

桃花高浪幾尺許
銀石沒頂不知處
兩兩鸕鷀失舊磯

銜魚飛入菰蒲去

德介氏

送行

琵琶聲裏寄離情
怨入東風曲不成
一夜高臺香夢冷
越羅裙上淚痕明

阮澤民

送湛內翰還朝

目送星軺萬里旋
那堪惜別思淒然
交關此日分岐後

南北春風共一天

占城使臣

進貢初發占城

行盡河橋柳色邊
片帆高掛遠朝天
未行先識歸心早
應是燕山有杜鵑

江樓留別

青嶂俯樓樓俯渡
遠人送客此經過
西風揚子江邊柳
落葉不如離思多

答里麻

西湖

一株楊柳一株花原是唐朝賣酒家惟有吾邦風土異
春深無處不桑麻

日本貢使

詠柳

湧金門外柳如金二日不來成綠陰折取一枝城裏去
教人知道是春深

全俊

和宋學士贈詩

一回錯買離鄉舶
抹過鯨波萬里間
震旦扶桑無異土
參方飽看浙西山

日本僧左省

呈沈潤卿

二月天和乍雪晴
見君似見祝先生
醉中不覺虛簷滴
吟作燈前細雨聲

天祥

暮春病懷

落花滿地雨絲絲九十春光又別離
行樂春深猶有恨
那堪多病過花時


機先

聞笛

夜聲吹笛是誰家
獨倚高樓月欲斜
塞上春情無賴甚
那堪又聽落梅花

雪夜偶成

定起閒吟獨倚闌
朔風吹面雪漫漫
脩心不到梅花地
耐得山中一夜寒



總校官庶吉士臣侍朝

校對官編修臣莫瞻菴

謄錄監生臣和其聲